

---

**MOCIÓN DO GRUPO MUNICIPAL DE COMPOSTELA ABERTA PARA QUE O CONCELLO DE SANTIAGO CUMpra O ACORDO ADOPTADO EN XUNTA DE PORTAVOCES DO DÍA 23 DE MARZO SOBRE OS 3,5 MILLÓNS DE EUROS EN AXUDAS DIRECTAS AO COMERCIO E HOSTALERÍA**

O Grupo Municipal de Compostela Aberta, ao abeiro do regulamento orgánico municipal do Concello de Santiago, presenta a seguinte moción para o seu debate no Pleno.

**EXPOSICIÓN DE MOTIVOS:**

O pasado día 12 de marzo, o alcalde, Xosé Sánchez Bugallo, anunciou que o Concello de Santiago podería ter 5 millóns de euros dispoñibles para novos investimentos e novo gasto corrente procedentes da liquidación e remanentes das partidas non executadas no ano 2020.

Ao manter o Goberno do Estado a posibilidade de destinar estes remanentes de tesouraría a gasto corrente, o día 15 de marzo, o alcalde propúxolles aos grupos da Corporación municipal destinar 2 millóns de euros a axudas directas para o comercio e a hostalería, dous dos sectores máis damnificados pola crise da Covid-19, e 3 millóns para novas obras. Non foi ata o 23 de marzo que o alcalde volveu convocar a xunta de portavoces na que se acordou unha proposta dos grupos da oposición para un reparto de remanentes con destino de 3,5 millóns de euros para axudas directas ao comercio e hostalería.

Ainda sendo unha iniciativa da oposición, o alcalde fixo público e presumiu do acordo na comunicación pública municipal, creando unha enorme expectativa en dous dos sectores máis golpeados pola crise da Covid-19.

Con data do 30 de marzo, a intervención municipal asina o informe da liquidación do orzamento de 2020 no que consta, finalmente, unha cifra inferior á anunciada polo alcalde días antes. Ainda así, o Goberno municipal demora unha semana máis, e non é ata o 7 de abril que volve a convocar unha xunta de portavoces para informar de que finalmente os remanentes dispoñibles de 2020 non serán os 5 millóns anunciados, senón 2,5 millóns de euros. A esta cifra engadiríanselle outros 6,5 millóns de euros, que se corresponden cos investimentos que o Goberno xa incluíra nos remanentes de 2019 pero que non conseguiu iniciar a súa licitación a tempo.

Ese mesmo día, 7 de abril, o grupo municipal de Compostela Aberta comunicou publicamente o apoio ao goberno local para procurar as fórmulas necesarias para cumprir o compromiso adquirido cos grupos da oposición e cos sectores da hostalería e do comercio para destinar outros 3,5 millóns de

euros a axudas directas. Para iso, solicitamos utilizar toda a cantidade dispoñible dos remanentes, pero tamén habilitar un modificativo dos vixentes orzamentos que complete a cantidade, ata cumprir co compromiso acordado.

Finalmente o goberno municipal, non conseguirá tramitar e levar o expediente a Pleno ata o propio 29 de abril, máis dun mes e medio despois do alcalde ter feito o inicial anuncio sobre os remanentes. Na proposta do goberno recollíanse axudas directas por valor de 2 millóns de euros imputables à liquidación do orzamento 2020, polo tanto 1,5 millóns menos do comprometido unánimemente entre os grupos municipais, de acordo coas necesidades do sector.

Cómpre lembrar que diante da crise da Covid-19, sectores como o comercio e a hostalería que teñen a súa base no consumo directo, teñen sido dos máis afectados polas medidas tomadas por causa da emerxencia sanitaria. Dous sectores de enorme importancia na nosa cidade e que empregan a millares de persoas, sendo por iso que todos os grupos municipais consideraron que era necesario destinar o máximo orzamento posible a axudas directas.

Por todo o anterior, e porque o comercio e a hostalería de Santiago non poden sair aínda máis damnificados nesta crise, o Grupo Municipal de Compostela Aberta presenta á consideración do Pleno o seguinte **ACORDO**:

**Co fin de cumprir co acordo de xunta de portavoces do 23 de marzo de 2021, instar ao correspondente órgano de goberno a:**

- 1. Iniciar o procedemento para aprobar un modificativo de crédito, do orzamento de 2021, para incorporar 1,5 millóns para unha nova partida de axudas directas para o comercio e hostalería.**
- 2. Acordar cos grupos e co tecido asociativo do comercio e a hostalería de Santiago, as bases para estas nova axudas directas.**

**Santiago de Compostela, 19 de abril de 2021**

**Marta Lois González**

**Portavoz do grupo municipal  
de Compostela Aberta**

**María Rozas Pérez**

**Concelleira do grupo municipal  
de Compostela Aberta**

**AO ALCALDE DO CONCELLO DE SANTIAGO DE COMPOSTELA**